

曾文正公奏稿

曾文正公奏稿

卷之二十一目錄

彙報近日各路軍情摺

同治元年十一月十二日

欽奉 諭旨分條覆陳摺

十一月二十七日

旌德涇縣解圍克復績溪祁門摺

全日

預籌選派員弁管帶輪船摺

十二月十二日

近日軍情片

迭奉 諭旨併案覆陳摺

十二月二十七日

近日軍情片

官軍攻克運漕並銅城關勝仗摺

同治二年正月十二日

謝曾貞幹追贈按察使 恩摺

全日

近日軍情片

鮑超軍大獲勝仗涇縣解圍摺

正月二十七日

近日軍情並陳親赴金陵察看片

全日

查閱沿江各軍並陳近日軍情摺

二月十二日

由金陵回皖沿途查閱並近日軍情摺

二月二十七日

沿途察看軍情賊勢片

鮑超軍克甯國近城要隘摺

三月十二日

近日軍情片

彙報近日各路軍情摺 同治元年十一月十二日

奏爲彙報近日各路軍情請

旨敕調江忠義移軍駐守皖北恭摺馳陳仰祈

聖鑒事竊自金陵援賊經官軍擊退後留守秣陵關分攻九洑洲並甯國旌德等處軍情臣於十月二十七日附陳梗概在案嗣據謀報僞忠王李秀成並未回蘇諸酋死黨多未遠颺仍在秣陵關六郎橋一帶修壘堅持俟僞侍王由東垣抬船過埧卽分向金陵金柱關以圖再逞十月十七八等日忠逆之子及僞章王對王數股併趨九洑洲一面圍李世忠各營一面晝夜趕渡先後衝過江浦浦口者五六萬人曾國荃以南岸諸軍節節

牽制北岸郡縣處處空虛抽撥周惠堂等兩營搶紮西梁山先
顧濱江要隘又商令李昭慶帶張樹聲五營自蕪湖北渡救無
爲州產米之區保皖南各營辦糧之路臣亦飛調李續宜所部
蕭慶衍八營移駐廬州毛有銘七營移駐巢縣部勒甫定僞對
王一枝直衝過李世忠各壘從和州之青甸廟斜趨而西於二
十七日陷含山縣二十八日竄踞巢縣十一月初一撲陷和州
查巢縣西北直達廬郡西南近接無爲廬江等州縣以入省垣
略一進步全局俱震張樹聲等五營幸已冒雪渡江駐紮無爲
州廬江一縣亦截留上海新募吳長慶等四營入城駐守廬郡
一城僅有石清吉四營亦截留唐訓方新募之何有能等三營

協守此外衝要之所若店埠若運漕無兵扼防臣所調李續宜部下之毛有銘一軍尙在固始蕭慶衍一軍尙在霍邱現今齊集舒城再行進兵賊蹤颺忽誠恐著著落後此賊竄江北辦理竭蹶之大概情形也甯國悍賊黃文金胡鼎文等自踞西河斷我水路糧運而僞輔王楊逆之眾又時時聲東擊西四出剽掠臣所改辦陸運自三山夾以至南陵數十里內尙無梗阻自南陵以至甯國府城到處阻賊雨雪泥滑艱於饋運城內外各營將士人人以缺米爲慮十月十三日賊乘張運蘭因病離營之際大舉攻城新任統將易開俊劉松山等登陴守禦礮石環擊賊始解退易開俊奉臣調援旌德之檄十一月初三日道出涇

縣適有甯邑另股由晏公堂畫眉嶺兩路而來圖襲涇縣城橫
斷徽甯之氣易開俊督同駐涇各營力戰卻之鮑超在高祖山
屯營雖多分汎過廣小挫之後未可遽議戰攻前調之王可陞
五營及何紹彩四營擬令分駐板橋黃麻渡先保糧路俟赴湘
新募之七千人陸續到皖時再行分途痛剿此甯國各軍戰守
艱滯之大概情形也其賴古諸逆之圍撲旌德者直薄城下環
攻不休朱品隆於十月十五日挫敗一次十月十七日小勝一
次十八十九等日大勝兩次毀平二十餘壘賊始退聚九十等
都旌德城幸得解圍別有昌化廣德各賊黨突陷績溪縣城分
竄歙境駐守徽州之皖南鎮總兵唐義訓會商左宗棠派援之

王文瑞等營於二十八九等日分道馳擊屢有斬擒十一月初
一日王文瑞敗賊於臨溪唐義訓敗賊於孔靈初二日合軍進
攻績溪克復縣城而旌德境內之賊復於初三日闖入太平縣
由焦村度雙阜二嶺初六日進踞黟縣之西遞地方意在竄撲
祁門斷徽州之餉道入江西之北境此股雖非甚凶悍而蹤跡
甚疾關繫極大祁門爲臣數載經營之地引領南顧實用隱憂
此又旌德績溪太平黟縣等處之大概情形也臣竊計本年秋
冬以來羣盜如毛南北環伺非先保皖北完善之區不能辦皖
南之賊自和州以上直至蘄黃十數州縣千里無兵非有大枝
勁旅長駐廬州舒桐一帶不特爲皖北無窮之憂亦且貽鄂豫

兩省之患毛有銘蕭慶衍雖稱健將才尙不足當此一路李續
宜病勢未痊亦難遽來多隆阿本約定進攻九洑洲會剿金陵
旣而改旆西征臣早料其必有他變夏間亦屢奏及之旋於九
月十二日奏請多隆阿移師東還

詔旨肫切未邀

俞允今則秦人痛深水火

聖主方眷顧西陲何敢更爲再三之請舍此則惟貴州提督江
忠義與安徽藩司江忠濬誼本兄弟又有伊兄江忠源遺愛在
民廬人至今頌之不衰倘調至廬州舒桐之交外事則令江忠
濬主之戰事則令江忠義主之必能艱難共濟屏蔽江淮合無

仰懇

天恩敕下江忠義統率現部三千人馳赴皖北與江忠濟同駐
廬境俾已復之疆土不至再就淪夷大局幸甚微臣幸甚除各
路戰狀及應獎應卹人員續行分案陳奏外所有近日軍情謹
繕摺由驛六百里馳報伏乞

皇太后

皇上聖鑒訓示謹

奏

欽奉

諭旨分條覆陳摺

同治元年十一月二十七日

奏爲欽奉

諭旨恭摺覆陳仰祈

聖鑒事同治元年十一月二十四日承准議政王軍機大臣字

寄十一月十五日奉

上諭唐訓方奏九洑洲逆黨竄陷和州等處廬郡喫緊請留張
得勝帶隊攻剿一摺此次逆匪由浦口屯紮後兩日閒迭陷三
城情形極爲飄忽巢縣距廬州甚近石清吉所部僅祇四營自
屬不敷守禦該署撫新募楚勇已抵舒城雖未經訓練以之守
禦尙屬可用諒已催提到廬曾國藩所調之蕭慶衍毛有銘已

否前進卽著催令迅速前往廬郡以資防剿現在曾國藩所部
兵勇迭次分撥雨花台及堵禦徽甯等處兵力未厚都興阿素
顧大局著派兵泝江而上節節會剿毋任滋蔓九洑洲係李世
忠之軍圍攻何以致令賊匪竄出是否不肯出力抑或兵少賊
眾之故著曾國藩等查明具奏至巢縣之濡須口和州之梁山
地處險要是否未爲該逆佔踞曾國藩尤當設法保全彭玉麟
等水師應酌量駛入巢湖會合攻剿其南岸蕪湖等處爲曾國
荃大營後路更應嚴加防範著曾國藩飭令水師在江面梭巡
毋令逆匪偷渡曾貞幹已赴雨花台大營蕪湖等處防兵是否
尙厚甚爲懸系刻下吳煦等所帶之常勝軍計已行抵九洑洲

務令將南岸之賊截住竄出之賊四路兜擊迅拔各城盡殲醜類惟在該大臣等隨時相機妥爲調度至此次北竄逆匪前據都興阿馮子材奏稱忠侍各逆糾黨七八萬由金陵約同九洑洲踞匪北竄而魯國藩奏稱忠逆已遁回蘇城揆度賊勢似南岸賊匪擊敗輪船擬入江攻剿九洑洲該處踞逆知己無援聞風先遁以致乘虛竄入和州等處故都興阿前奏有該逆均已薙髮之說若上下游官軍會同痛剿必可擊散倘忠侍各逆糾黨北竄必須厚集兵力方能制勝著魯國藩查明實在情形會同都興阿富明阿唐訓方妥籌剿辦此股北竄賊匪究有若干賊目何人如何竄陷和州等處各情唐訓方所奏甚屬疏略著

曾國藩查明具奏李續宜自回湘後已逾兩月諭令毛鴻賓迅
催起程東下並著曾國藩函催以資臂助等因欽此跪讀之餘
無任欽悚查南北兩岸軍情臣於十一月十二日業已彙陳大
概茲蒙

聖主縷晰垂詢無微不至謹就近日軍務情形一一分條詳對
如左

一恭奉

諭旨垂詢廬州守禦及蕭慶衍等進兵一節查渡江之賊前隊
在巢縣屯聚擄糧其後隊於十一月初九日竄聚運漕鎮廬州
城守之兵前有石清吉四營又截留唐訓方所部義字三營足

敷守禦臣所調蕭慶衍八營十四日已到舒城毛有銘七營二十日續到舒城進兵之路若走巢湖之北由柘皋以至巢縣則係用眾之地軍無後繼轉運維艱若走巢湖之南由無爲以進運漕則係用寡之地得水師相輔而行較爲穩著該二軍已於二十二三等日由舒城拔赴無爲州擬攻運漕以截巢縣後路惟北路廬州柘皋一帶尙少一枝勁兵恐難得手前疏請調江忠義一軍伏懇

鴻慈俞允庶皖北不至糜爛

一恭奉

諭旨飭令都興阿派兵會剿並垂詢李世忠是否出力一節查

都興阿駐守揚州自撥楊心純千八百人赴援雨花台後兵力已薄且九洑洲北犯之賊麕聚於江浦浦口可以上竄和州巢含卽可下竄揚州裏下河都興阿自宜專保揚防不必兼顧上游且中隔浦六等城亦難出境會剿此次賊竄北岸係忠酋帶至金陵新渡之賊非僅九洑洲舊踞之賊一面圍撲李世忠營壘一面衝過該營繞越上犯聞該提督部下亦嘗接戰多次屢有擒斬外閒因賊所經過數城數卡皆係李世忠汛地往來自如無傷無礙有疑其部下不肯出力者并有更甚其詞者臣皆付之不聞不問大抵因分汛太廣賊股太眾以致未能堵截該提督尙有數咨具報力戰屢次請獎請卹之案臣卽日當爲彙

案陳奏

一恭奉

諭旨垂詢濡須口梁山是否保全并水師駛入巢湖一節查裕溪口卽古之濡須口近爲彭玉麟駐紮水師之地業經曾國荃抽撥周惠堂等兩營分守裕溪口及西梁山兩處水陸倚護尙可保全惟巢湖在巢縣之上水師又在運漕之下巢縣運漕兩處旣爲賊踞則舢板飛划均不能由賊中衝駛入湖

一恭奉

諭旨垂詢曾貞幹赴雨花台後蕪湖防兵是否尙厚一節查臣弟曾貞幹自五月赴金陵大營秋閒邁病閏月稍愈本擬離營

調養適值援賊大至力疾督戰四十六日解圍後積勞病劇遽於十一月十八日在營身故皆由臣位高德薄咎積災生疫氣流於軍中餘殃及於手足所部十營併隸曾國荃統轄尙慮力難兼任臣擬親赴金陵察看一次又以皖南北賊燄方張未敢輕離安慶致令人心搖動至蕪湖要地有周萬倬吳坤修等營守之金柱關有朱南桂羅逢元等營守之防兵尙厚仍時與楊岳斌水師截擊渡河之賊十一月初八十三十七十八等日水陸俱獲小勝曾國荃以沿江要隘恐有疏失又從金陵分長勝兩營赴龍山橋嘉字一營駐東梁山俾作蕪湖之聲援而固金陵之後路

一恭奉

諭旨飭令常勝軍截住南岸竄賊一節查洋將白齊文常勝軍於九月中旬定議來援金陵屢次愆期厥後奏明十月十九日起程吳煦先帶輪船兩隻赴鎮江齊隊乃白齊文索餉遷延迄未入江十一月十四日在松江閉城滋鬧十五日帶洋槍隊數十人至上海毒毆楊坊刃傷其賊屬搶奪洋銀四萬餘兩而去如此跋扈橫行毫無紀律不特中國不能資其力以剿賊亦爲外國之所公惡應由李鴻章奏明知會駐京公使嚴行懲辦

一恭奉

諭旨查詢李秀成蹤跡及北竄賊目何人一節查僞忠王李秀

成尙在金陵前次所稱遁回蘇城係屬諜報未確業經續奏聲明在案此股渡江賊目爲僞章王對王及忠逆之子據李世忠報實有八九萬人現據巢縣者爲僞對王洪春元只有假冒官軍旗幟頂帶之事並無薙髮之說確由金陵竄出圖犯廬州安慶掣動南岸之兵勢其九洲賊巢現仍堅踞如故該洲與金陵城賊一葦可杭朝夕往還不至因無援而先遁

一恭奉

諭旨飭令函催李續宜起程東下一節臣近因事機不順日夜憂灼其望李續宜回營迫切之情百倍於他人惟見其病勢頗重到籍以後亦未痊愈欲借百日之假調養有用之身正月初

三日假期已滿現經兩次函催無論能否病痊屆期決當銷假
東下兼程履營力圖報稱

以上各條謹就奉

旨垂詢之件分晰條對由驛六百里馳奏伏乞

皇太后

皇上聖鑒訓示謹

奏

旌德涇縣解圍克復績溪祁門摺同治元年十一月二十七日

奏爲旌德涇縣先後解圍徽浙各軍克復績溪祁門兩城恭摺

馳陳仰祈

聖鑒事竊自逆匪攻犯旌德分撲涇縣官軍力解城圍績溪旋失旋復賊由旌德之九十等都繞竄祁門臣於十一月十二日略陳大概聲明續報戰狀在案十月初八九等日賊酋賴文鴻古隆賢等自廣德甯國縣竄入旌德之六都距城僅八九里守城總兵朱品隆簡病勇中之能戰者禦賊於楊村一戰卻之十二日賊分三大枝攻撲東南北三城而以一枝猛撲西門外胡暉堂之營壘魚貫而進直薄濠邊洋礮洋槍密如驟雨胡暉堂

督飭士卒憑營穩擊子藥將盡朱品隆以該營戰久力乏恐有疏失遂率兩哨及朱步青所帶隊伍衝出西門入營助守火器齊發殪賊無算賊乃愈攻愈猛爭拔花籬躍躍欲上朱品隆令胡暉堂悉力守禦仍自出營突陣立斬騎賊四五人從外夾擊賊始返奔其攻城之賊亦退至數里外下寨是夜賊又擁眾進攻越兩日夜竟無一刻休息十五日朱品隆恐賊立營一定糧路不通遂派隊啟城出擊鏖戰兩時破賊三壘而東北各門之賊捲地而來忽以馬隊數百抄我兩翼我軍小卻且戰且走賊勢遂若湧潮攻我北門斬卡競進胡太旂劉永勝奮奮卡隘力戰死之急以全桶火藥轟擲賊乃負創而退十七日賊復大舉

攻城我軍因前一日小挫未經出城迎戰礮石外擊傷賊頗多
十八日賊攜長梯數百架擋牌數千張將欲甘心一逞朱品隆
令洪德發帶隊由東門過橋牽制東路之賊令易潤壇朱聲隆
朱步青由西門排列城下仍親率老營部卒向大北門往來督
陣賊見我軍整隊齊出悉銳來犯朱品隆以火箭環射焚賊擋
牌易潤壇朱聲隆朱步青等在西門搏戰方酣忽見胡暉堂營
中火光突起恐有挫失奮力一衝截賊數段胡暉堂乘勢出壘
猛擊賊目羣賊一鬨散走而東門南門等股經洪德發等縱橫
盪擊亦卽紛紛駭潰次日昧爽朱品隆登陴瞭望知賊已懈復
督諸將分路出擊擒斬極多毀平二十餘壘賊向楊村轉遁至

九十等都旌德遂於十九日解圍方旌德之被圍也臣調易開
俊三營吳廷華二營由甯郡往援十一月初三日馳抵涇縣適
吳廷華二營先一日入城正在料量赴旌旋報甯邑賊黨由漕
溪竄聚埧頭初四日賊由晏公堂畫眉嶺分兩路而來環攻涇
縣易開俊吳廷華各率所部登陴守禦賊但聞涇縣守兵極單
而不知援旌之軍適集於此倉皇遽遁此十月十九十一月初
四等日旌德涇縣解圍之情形也先是昌化踞賊巢逆陳逆等
股率黨數萬於十月二十四五等日陸續竄入績溪縣城并在
孔靈分築卡壘意在阻絕旌德糧路二十八日皖南鎮總兵唐
義訓率強中禮後震字等營會合左宗棠派援之王文瑞老湘

七營馳紮臨溪途遇野掠零賊縱軍擊之小有斬獲二十九日賊以千餘眾犯我中路我軍奮勦卻之是夜孔靈一帶烽燧蔽空料有賊至唐義訓王文瑞共議分道進攻十一月初一日唐義訓率所部專攻左路王文瑞率所部攻中右兩路行未半里賊已蜂擁猝至王文瑞飛飭前右後三旗直前迎敵左右兩翼從外斜抄而以親兵爲後應號鼓齊發兩鋒相交楊海泰龔隆貴王明輝等騰蹕而前遇者輒殪左翼羅瑞山右翼郭德馨從山坳抄出陳清泰葛蘭世等從山梁壓下賊眾披靡不復成伍右路曾聚賢亦搜殺而來會敗賊尸駢林谷殆以千計其唐義訓一軍進次孔靈賊正出巢來撲各營併力衝突賊勢大沮縮

入村中唐義訓揮隊猛攻連破村旁四壘並毀堅卡五重軍士
入村勦捕誅夷羣賊唐義訓派強新一營繞出雄路之後天晚
雨甚與王文瑞會師於績溪城外里許時至夜分謀報城賊將
遁唐義訓王文瑞令各營裹飯傳餐嚮明出隊則賊方出城紛
走我軍收復城池一面躡賊尾追直至叢山關而還方唐義訓
王文瑞進剿之時而旌德之賊已於初三日竄至太平遂由焦
村進雙阜二嶺初六日竄黟縣所屬之西遞地方初七日駐祁
門之良字兩營在黟境之西武嶺迎戰挫衄賊已於初七日突
陷祁門維時唐義訓甫自績溪回軍徽郡王文瑞回軍革市聞
祁門之警星夜馳援業已無及初九日兩軍由漁亭進駐花橋

將以次日會攻祁城賊不知大兵之驟至闔城鼎沸遂謀宵遁我軍於初十日進復縣城僅斬尾隊百餘人而賊之前隊早出赤嶺從田家樂返竄石埭太平一路此十一月初二初十等日連克績溪祁門兩縣之情形也臣查賴古諸賊酋圖假徽境就食江西已非一日乃不得逞於旌涇績溪數縣而繞越祁門蓄計至狡關繫至鉅幸仗

聖主威福將士用命屢卻兇鋒再復名城除飭各營嚴行防禦外此次尤爲出力之布政使銜卽選道王文瑞可否

交軍機處記名以道員遇缺題奏總兵銜湖南補用副將王開琳總兵銜副將王品高可否

賞給勇號副將銜參將蔣信玉江西補用參將王華雲可否以副將儘先推補其餘在事出力人員王文瑞一軍可否由左宗棠保獎唐義訓一軍可否由臣酌獎之處出自

恩施記名總兵胡太旂安徽補用參將劉永勝江蘇卽補游擊張仁興擊賊陣亡深堪憫惻應請

敕部從優議卹所有旌德涇縣解圍績溪祁門並復緣由謹繕摺由驛六百里馳奏伏乞

皇太后

皇上聖鑒訓示謹

奏

預籌選派員弁管帶輪船摺

同治元年十二月十二日

奏爲遵

旨籌辦恭摺密陳仰祈

聖鑒事竊

臣等承准議政王軍機大臣密寄同治元年九月二

十九日奉

上諭總理各國事務衙門奏購買外國船礮明春可到請飭預
派將弁水勇以備演習並請妥籌配派各摺片購買外國船礮
近以勘辦髮逆遠以巡哨重洋實爲長駕遠馭第一要務曾國
藩前次覆奏有駛到安慶漢口時商定奏辦之語第俟該船駛
到再行商辦誠恐一時選派難得其人且停泊過久難保洋人

不另出主見流弊不可不防現在既據赫德呈稱此項船礮明春可到其單內所稱輪船應派官兵及礮手水手水師等兵並船上當差甚苦須用健壯之人等語雖較之上年所開之單尙爲覈實惟是否應如此酌派殊難懸揣官文曾國藩久轄南疆見聞較稔著卽相度機宜參以赫德之言悉心籌酌將應用將弁兵丁水手礮手等人於該船未到之先一律配齊俟輪船駛到卽可上船演習免滋流弊至酌留外國水手人等多則經費太鉅少則教導不敷應如何辦理之處並著屆時與稅務司等熟商妥辦其赫德單內有水手用山東人礮手用湖南人水師兵用八旗人之語自係爲膽氣壯實及火器嫻熟起見惟因地

制宣仍在官文曾國藩詳悉籌辦務收實用其應如何選派之處卽著迅速具奏總理各國事務衙門摺片各一件赫德呈單一件均著鈔給閱看將此由五百里各密諭知之欽此仰見

皇上慮遠思深先事豫籌之至意

臣

等遵卽與侍郎彭玉麟提

督楊岳斌往返密商適值金陵甯國援賊大至東垣抬來之賊船散布甯太各湖大港小汊一片逆氛水師上下防剿數月以來刻無暇晷茲據楊岳斌彭玉麟密覆前來查有統帶巡湖營提督銜記名總兵蔡國祥勇敢耐勞久隸楚軍水師歷著功績而又籍屬廣東易與洋人熟習堪以統轄七船又查有副將銜參將盛永清參將袁俊參將銜游擊歐陽芳鄧秀枝周文祥蔡

國喜游擊銜都司郭得山年力精壯向歸蔡國祥節制堪以各
領一船此外水手礮手兵丁等項據赫德單內所開人數分列
多寡尙合機宜應如所請辦理惟擬用山東湖南八旗人等雖
係因材器使究嫌參雜不齊臣國藩去秋覆陳一疏有云輪船
駛至安慶漢口時每船酌留外洋三四人令其司舵司火其餘
卽酌用楚勇所有學習駕駛司放礮位等事應請卽由蔡國祥
於所部弁勇中豫爲派定誘掖獎勵以去其畏心委任責成以
程其實效始以洋人教華人繼以華人教華人既不患教導之
不敷又不患心志之不齊且與長江各項水師出自一家仍可
聯爲一氣不過於長龍舢板數十營中新添輪船一營而已旣

見慣而不驚自堆放而皆準抑臣等更有請者兩湖水勇能泛江不能出海性之所謂遷地弗良但可駛至上海不能遽放重洋本年二月間經臣國藩據實陳明旋奉

寄諭現籌購買船礮本擬用於江面並非施之海洋仰荷聖謨閣遠俯順物情宣示軍中咸知感激倘蔡國祥經營之後由楚勇而參用浙勇參用閩粵之人由上海而漸至甯波漸至山東天津亦未必終不可出洋巡哨觀政海邦惟目下一二年內則須堅守前約不令放洋俾臣等不失信於將士庶幾恩誼交孚號令易行區區愚忱不得不重言申明惟求聖慈鑒諒所有遵

旨籌辦緣由謹會同兵部侍郎臣彭玉麟福建水師提督臣楊岳斌由驛覆陳伏乞

皇上聖鑒訓示謹

奏

近日軍情片 同治元年十二月十二日

再近日軍情金陵大營堅守如常北岸巢縣之賊掠至殷家橋
運漕之賊竄至湯家溝十一月二十四日撲近無爲州北門外
我軍出隊堵剿金陵派援之劉連捷三營恰至賊卽卻走蕭慶
衍毛有銘兩軍亦於二十六七日趕至無爲州連日雨雪尙未
開仗南岸楊岳斌水師於十九二十二等日在三汊河奪舢板
槍划二十餘號二十七日會同陸兵羅逢元等攻破護駕墩兩
岸逆壘焚奪賊船二百餘號僞侍王在東垠抬來之船不復能
逞志矣周萬傳吳坤修兩軍於二十七日攻剿石埭及三不管
地方踣毀兩卡四壘焚其輜重金柱關蕪湖兩路幸皆穩固甯

國鮑超一軍於二十七日進攻馬頭楊柳鋪之賊大獲勝仗踏
毀賊館賊卡甚多惜所募新勇未齊不能乘勝痛剿水陸糧路
仍有梗塞之虞駐守涇縣之易開俊吳廷華等營二十六日擊
賊於晏公堂獲勝一次二十七日追賊於黃村挫敗一次太平
石埭兩縣賊踞如故擾及陵陽鎮初五日竄入青陽縣城臣現
檄調朱品隆一軍棄去旌德而移剿青陽縣城以顧涇縣後路
未知能得手否除各路戰狀容再分案詳奏外合先附陳梗概
伏乞

聖鑒謹

奏

迭奉 諭旨併案覆陳摺 同治元年十二月二十七日

奏爲欽奉疊次

諭旨併案覆陳仰祈

聖鑒事竊自本年九月以來南北兩岸戰事日亟臣歷奉

寄諭殷殷下問有隨時詳奏者亦有未及具覆者茲就關涉軍務各事件分晰條列敬爲

皇上陳之

一恭奉十一月初八日二十一日兩次

諭旨飭令壽州防兵未可輕動並垂詢苗練不至另生枝節是否確有把握又奉十二月初三日

寄諭因袁甲三之奏飭令派兵駐紮壽正二處俾該練有所震懾各等因臣查前此苗沛霖之黨擄殺湘軍樵採勇夫衅端漸開其時僧格林沁正撫苗勦捻給以餉項苗黨則痛詆楚師大肆簸弄臣恐因勦撫之兩歧致南北之不和適值北岸和含巢三城並陷遂將壽正防軍撤出騰挪赴援明示以坦然不疑正冀其幡然自悔當臣撤兵之際實因盧巢變生倉卒移緩就急亦未敢必苗練之不另生枝節現在事隔兩月該練尙無據城以叛之跡且觀其上撫臣唐訓方之稟與鳳台知縣蔡鏐之函均屬恭順近理或者感僧軍撫馭之恩無湘勇逼處之嫌不至更生他變此際若另行籌兵駐紮陽撫陰防使反側者無以自

妄似不如推誠相待無庸戍守轉可省兵力而免後患如果反
覆無常逆迹萌著臣與李續宜之兵自度剿髮匪則不足制苗
練則有餘不足深慮

一恭奉

寄諭以李世忠負其沈鷺之氣既能束身歸命總宜因材器使
化其桀驁俾爲我用又奉十一月二十一日

諭旨以李世忠之軍漫無稽察恐其勢日形扞格因而生心嗣
後相待李世忠可仍照袁甲三之法酌中辦理以安其心等因
朝廷撫馭降將仁至義盡臣自當仰體

聖主不得已之苦衷委曲求全惟該軍投誠雖久舊習未改李

世忠頗驕亢任性其部下尤恣橫無狀捆鹽自售場埧避其凶
燄設卡抽釐商民視爲畏途與之相處最近者下而都興阿一
軍上而楊岳斌曾國荃兩軍均以與滁軍交接爲苦往往口角
爭鬪釀成命案卽如本年九月間臣將二起馬隊遣回黑龍江
十月初六日委營總那勒豐阿等行過江浦縣滁軍卡員不准
放行毆斃及推水淹斃官一員兵二名盤費行李全行失去該
西丹等投入揚州營中稍加周卹臣與都興阿均未敢深究此
次賊由九洑洲渡江外間頗騰物議臣亦絕不吹求全其體面
自袁甲三去位以後臣分解滁軍餉銀二萬五千兩火藥三萬
五千斤米三千石及大礮子彈等項陸續接濟冀安其心而策

其力惟該營餉項窮絀臣不能按月供支其捆鹽來上游售賣亦未准免抽江釐在該提督不無缺望目前雖無甚扞格將來弁勇口角太多恐不免激成事端倘有萬難含忍之處或須示以檢制稍加懲究臣當隨時奏明辦理

一恭奉十月十三日

諭旨垂詢楊岳斌彭玉麟二員中能否派撥一員駛赴下游江面駐紮防剿一節查本年八月十二日臣於覆陳摺內奏明楊岳斌親赴靖江如皋通州海門等處察看一次當因楊岳斌行次鎮江抱病而回商令彭玉麟代之又以金柱關告警遂不果行厥後兩岸水師數月防剿日不暇給楊岳斌防守金柱關以

備東壩抬出之賊船彭玉麟駐守裕溪口以備巢湖竄出之賊
股且下自金陵上至九江節節皆有師船設防上游方戰爭不
慮實不能移紮下游江面

一恭奉九月二十六日通飭

諭旨飭派都司以下武弁學習外國兵法臣雖未嘗親見洋人
用兵然聞其長處約有二端一曰器械精堅二曰步伍整齊其
短處亦有二端不紮營壘不住帳棚人數稍多勢難合併一也
口糧太重製器太貴用兵稍久國必困窮二也善學者自須用
其所長去其所短臣部各軍分駐皖境距海尚遠較之濱海華
洋雜處者風氣略近樸實常勝軍之口糧太多臣方深以爲非

藉酌挑數人馳赴上海甯波恐未得洋人之長技先染加餉之惡習臣愚以爲有心學習人不在多人多而聚學則學者圖增重餉教者圖侵兵柄人少而竊學則一人可教什伯十人可行千萬巫臣霸吳其始不過一人教射御之事吳人破越其始不過一客習泝泝之方近聞撫臣李鴻章已派張遇春之勇隨英國兵頭教習炸礮劉銘傳之勇隨法國兵頭教習洋鎗如果步武槍礮一一習熟臣當商李鴻章派員來皖轉教臣軍至外國火器諸臻精巧惟銅冒自來火費錢有限而妙用無窮尤遠勝於中國引藥有畏風畏雨之患臣擬設法推廣用之於鳥槍抬槍諸器現飭工匠試造不知可期有成否

一恭奉十二月初一日

諭旨以英國公使信南副領事官可至金陵城內曉諭逆賊投誠飭令酌辦一節查金陵一城袤延百里之遙盤踞十年之久我軍分屯雨花臺僅扼城南其東西北三面並未合圍詎能制賊死命本年九月間賊援大至該逆雖屢受懲創我軍亦迭有傷亡且分僞對王納王等竄擾北岸佔踞三城目下僞忠王雖潛回蘇州而金陵城外各賊羣布置嚴密並不少懈左宗棠雖攻克嚴州而僞侍王一股窺伺太平金柱專圖進取並不回援至甯國楊黃諸酋與鮑超一軍相持雖屢次添兵助剿而糧道迄未通暢各路賊勢尚未窮蹙遽冀其獻城乞降酌理準情未

敢憑信至自拔來歸不得妄加殺戮臣亦嘗納降數次未敢輕於屠殺此次欽奉

諭旨尤當嚴禁軍士私取財物申明約束以導向化之路以上各條皆係數月內奉

旨垂詢飭辦之件理合一條對由驛六百里覆奏伏乞

皇太后

皇上聖鑒訓示謹

奏

近日軍情片 同治元年十二月二十七日

再近日軍情北岸水陸各營於十二月初九日在運漕上游擊賊獲勝初十日彭玉麟水師攻毀三汊河賊壘蕭慶衍陸軍攻克運漕鎮悉焚賊巢誅戮無算餘匪遁歸銅城關而去十三日毛有銘一軍在東關小勝一次二十日在芙蓉嶺敗挫一次損鎮將數人目下廬郡無爲廬江各城三河運漕西梁山裕溪口各隘均有勁兵守定臣又調蔣凝學防守舒城皖北或可無虞曾國荃金陵一軍於十二月二十一早攻襲谷里村朱門六郎橋三處賊巢大獲勝仗破賊壘十一座擒斬三千餘人皆忠逆布置以護衛金陵老巢者也金柱關蕪湖兩處近無戰事惟謀

報侍逆又從東壩抬船西來始終窺伺蕪湖要地防務殊難鬆
勁甯國一路十二月初五日王可陞於馬港獲一勝仗而小淮
審尙爲賊踞水路運道仍被梗塞曾國荃派劉連捷三營移駐
三山保全陸路糧道鮑超及郡城涇縣各軍堅守如常池州一
路韋志俊於十八日進攻青陽未能得手現飭朱品隆督軍由
池州繼進倘能攻克青陽則太平石埭等股可冀次第掃蕩徽
州祁門一路近日防守安謐足慰

宸廑除各路戰狀及應行請卹人員容臣查明續報外合先附
陳梗概伏乞

皇太后

皇上聖鑒謹
奏

官軍攻克運漕並銅城關勝仗摺

同治二年正月十二日

奏爲官軍攻克運漕鎮後進剿巢縣小挫旋在銅城關兩次獲勝恭摺馳陳仰祈

聖鑒事竊北岸官軍攻克運漕鎮

臣國藩兩次具陳梗概聲明

續奏戰狀在案嗣據各營稟報僞對王一枝竄聚巢縣分撲西梁山經周惠堂節次督軍剿退後遂踞運漕銅城關東關各隘偵知無爲州產米最富守兵又單於上年十一月二十四日擁三四十眾撲近州城北門外李昭慶率樹字等營開城迎戰會泗美帶水師右營從新河口橫出擊之適劉連捷亦自金陵來會賊乃負創卻走越數日

臣國藩所調之蕭慶衍毛有銘兩軍

先後馳至議以毛有銘所部嚴備巢縣東關之賊蕭慶衍所部專攻運漕銅城閘之賊十二月初九日臣王麟令右營定湘營師船駛抵運漕上游二里許渡蕭慶衍陸師過河築寨未及盡濟乃該鎮踞賊糾股突出偏營而陣圍裹數重我軍在水次燃礮仰轟仍分舳板數號接渡後濟之軍環起縱擊殲獲頗眾毛有銘正帶馬隊渡黃淮河履勘形勢一聞運漕礮聲飛騎助戰賊知不敵敗遁歸巢初十日我營修築既成臣王麟飭曾泗美右營喻俊明定湘營護定陸師向運漕自上攻下親督成發翔左營王吉嚮導營唐敏義澄海營向三汊河自下攻上該處有三石卡一大石壘堅峙街心未易攻取成發翔帶飛划由水路

進王吉帶水勇登陸由北岸進唐敏義帶水勇登陸由南岸進戰不兩時遂斷浮橋悉焚卡壘賊之攔刃墮河而死者不止數百人臣王麟白三汊河引軍西上與曾泗美喻俊明遇乃知太馬頭一橋二壘亦就毀平蕭慶衍督率馬步等營四面縱火斬隘直入縱橫鈔殺立復運漕一鎮乘勝躡賊直至黃墩誅斬無算餘匪歸併銅城關而去此十二月初十日水陸各軍會克運漕鎮之情形也運漕既復而後毛有銘率親兵馬隊回駐石澗埠卽於十三日部勒各營出哨東關見賊對河列陣正與曾泗美礮划往來拒敵急派湘右營渡河夾擊斬賊二三十級賊仍縮入卡內連日增黨修濠堅伏不出毛有銘知東關之未可遽

圖也不如徑取巢縣以爲攻心之計二十日就各營中抽撥六
成隊伍越芙蓉嶺迤邐前進突有五千餘賊在前面山岡揚旗
吹角張兩翼鈔來毛有銘隨令信中溥左溥右三營禦左路湘
中湘右二營禦右路兩鋒相交會不少卻乃以馬隊橫掠賊陣
賊始披靡我軍奮力薄賊馳逐一里許正思撤隊回營詎林木
間鼓聲忽起巢縣悍賊蜂擁而來徑鈔信中溥右兩營頃刻合
圍彭星占與諸弁勇左右馳突裏入垓心胡得勝陳東祥謝濟
偁呂鴻榜李春生等力戰死之彭星占憤怒填臆負傷決戰手
刃數賊並歿於陣毛有銘飛飭湘中湘右溥左等營合軍併擊
賊漸解退比見劉義勝匹馬衝入中槍而殞該逆仍復回戈轉

圖且卻且前各軍以抬礮猛擊殲斃前鋒數百人乘賊隊散亂
爭相駭奔之際遂奪獲彭星占尸骸而還此二十日毛有銘一
軍在芙蓉嶺擊賊小挫之情形也其銅城關一路賊於要衝築
四卡以阻我陸師又築一水卡以阻我舟師蕭慶衍先於十四
日移軍黃墩張家渡旋派營勇平渡口土埂俾利戰船駛擊十
九日臣王麟飭令喻俊明成發翔王吉唐敏義等攻破水旱諸
卡隨結小划爲橋渡過陸師全隊二十一日蕭慶衍令趙太和
率爲左營郭鵬程率毅右營攻陶家觜第一壘洪致祥率亨中
營胡發達率強右營攻陶家觜第二壘復令朱吉玉率爲右營
蕭恒書率爲前營攻大甲村賊壘仍自率貞中營及劉長槐之

元左營爲各路策應天甫向曙諸道並進賊正欲出壘迎拒我軍已環偪濠邊火器飛擲燃及哨棚眾勇於烈燄中躍過濠溝摩肩而上一壘旣破各壘盡亂駢戮盈千并斬僞安燕福文姓諸酋水師亦分隊連毀沿隄數卡乘勢進取岷山岡逆壘賊皆惶遽失措踰牆欲遁蕭慶衍麾軍直進立焚二壘擒斬尤多遂繞出銅城閘後奮攻石壘尋以賊援麇集相持未下二十二日蕭慶衍派趙太和朱吉玉蕭恒書劉長槐四營於近接該閘之黃龍口地方相度營基分隊移紮又派洪致祥胡發達郭鵬程三營親帶貞中一營整軍以爲之備不移時而閘中羣賊糾合陶家廠關門鎖銅城廟洋獅背新塘街五顯集百旺市東關各

股分三路來犯蕭慶衍率各營縱兵鈔擊少挫兇鋒中路之賊敗過閘口左右兩路之賊退聚閘後累軍乘之賊又從閘後出兩大股一走閘西堤埂一走岷山岡之東蕭慶衍令蕭恆書朱吉玉堵住東路潛遣洪致祥郭鵬程趙太和等分伏黃龍口村內而以劉長槐胡發達等隊赴閘口誘賊賊果輕我兵寡蜂擁齊出劉長槐胡發達斂軍佯退俟賊撲過村口伏兵突發亂刃交刺該逆無心接仗衝出重圍維時岡東一股聞風竄遁閘西一股亦經水師擊走我軍日暮收隊略有損折此二十一二等曰蕭慶衍一軍進攻銅城閘毀壘獲勝之情形也臣等查賊在巢縣廣聚悍黨距守數隘意在紛竄皖北郡縣冀解金陵之圍

此次克復運漕進規銅城關苦戰兩日尙屬得手惟肅慶衍毛有銘兩軍不滿八千人兵單賊眾未能遽期掃蕩現飭諸軍堅守各城隘俟春水稍漲再行水陸會剿恢復要區所有在事出力人員擬請酌保數員附入潁西剿擒案內彙求

恩施外總兵彭星占數年征剿嚴明勇敢艱險不辭臨陣捐軀深堪憫惻應請照總兵立功後陣亡例從優

賜卹都司銜藍翎守備胡得勝藍翎守備劉義勝陳東祥藍翎千總謝濟傳藍翎把總呂鴻榜藍翎外委李春生同時陣亡并

請

勅部各照本職本銜從優議卹所有官軍攻克運漕分道進戰

各緣由謹會同大學士湖廣督臣官文由驛六百里馳奏伏乞
皇太后

皇上聖鑒訓示謹

奏

謝曾貞幹追贈按察使

恩摺 同治二年正月十二日

奏爲恭謝

天恩仰祈

聖鑒事竊

臣接准兵部火票遞到同治元年十二月初六日奉

上諭前因知府曾貞幹擊退援賊後降旨詢問該知府紮營何處茲據曾國藩覆奏該知府自五月馳赴江甯大營秋間邁病適值援賊大至力疾督戰解圍後積勞身故等語曾貞幹自赴江南軍營屢著戰功朝廷早欲擢用因曾國藩再三懇辭擬俟江甯克復後從優獎勵茲以力疾督戰積勞病故悼惜殊深雖未經曾國藩奏請給卹而曾貞幹係效力疆場戰功卓著之員

著卽追贈按察使卽照按察使軍營立功後病故例議卹以示優異欽此跪誦之下感激涕零適值曾貞幹靈柩經過安慶當卽宣告靈前望

闕叩頭謝

恩訖伏念臣弟貞幹秉質愚蒙持躬介特爲諸生時不甚肄習舉業頗究心搏力技擊之法咸豐三年帶勇六百人隨臣剿賊旋以臣父年老回籍侍親八年十月因胞兄國華殉難三河蒙文宗皇帝屢降諭旨褒卹有加痛哭發憤誓出殺賊以雪兄仇而報

國恩頻年以來會克太湖潛山安慶蕪湖獨克繁昌南陵疊蒙

天恩獎敘聞望漸隆而臣弟貞幹孤懷鬱抑耿耿若不自得常思別樹一幟建立奇功以分

聖主宵旰之憂一洗軍營因循之習上年秋閒遭病羣勸出營調養適以援賊大至力疾督戰精神遽振日夜不倦臣方幸其病後耐勞志定勝氣人定勝天或者別立尺寸之功一償平生之願不料其中道損折齋志長終精炯炯而不冥神依依而戀闕微臣位高德薄殃及手足慟惜之餘彌增悚歉而

聖主優詔褒卹若深鑒臣弟未白之衷而曲體微臣難言之隱此尤臣所闔門感戢存沒霑戴者也茲已素旄西旋歸從先隴結草之報縱難索諸幽冥敵愾之情端有資於同氣臣當督率

臣弟國荃益勵丹誠誓除氛祲戰兢以任艱鉅忠信以涉波濤
庶慰季弟未竟之志而答

聖主非常之恩所有感激下忱謹率同江蘇布政使臣曾國荃

恭摺叩謝

天恩伏乞

皇太后

皇上聖鑒謹

奏

近日軍情片

同治二年正月十二日

再近日軍情金陵大營及金柱關蕪湖各防堅守如常均臻穩固青陽賊眾聞朱品隆一軍於二十二日趕到池州卽於二十三日陸續遁歸石埭十二月二十五日官軍收復青陽縣城駐兵守之正月初一日賊糾大股六七萬眾窺犯涇縣繞城築壘分踞黃村大坑一帶初四日涇城守將易開俊吳廷華等擊退撲城之賊鮑超於初五日自甯國疾馳九十里引軍來援遂於初六日會攻附城賊壘二十餘座悉破之乘勝進兵黃村又毀十數壘斬馘盈萬立解涇縣之圍初七日馳歸高祖山老營而羣賊已麇集寒亭清弋江等處勢將圍撲營盤計日內必有數

次大戰北岸之賊分踞和含巢縣東關銅城閘等城隘據守益
堅據搜獲僞文稱僞忠王現赴蘇州因常熟賊曰周興隆駱國
忠等投誠忠逆調集羣賊圍攻常熟不久卽率二十萬眾再犯
江北下擾揚州上窺皖楚等語雖未必果有其事而疊次僞文
該逆銳意竄擾大江以北殊可深慮除涇縣戰狀再行詳奏外
合先附陳大概伏乞

皇太后

皇上聖鑒謹

奏

鮑超軍大獲勝仗涇縣解圍摺

同治二年正月二十七日

奏爲鮑超一軍破賊於馬頭鎮楊柳鋪等處進援涇縣立解城圍恭摺詳報仰祈

聖鑒事竊浙江提督鮑超上年十一月二十七日在楊柳鋪擊

賊獲勝及本年正月初六日涇縣之捷臣兩次附陳大概在案

先是西河踞賊分擾小淮密地方與黃麻渡只一河之隔鮑超

以該處守兵單薄水陸糧路司虞乃督馬步數營並何紹彩新

訓二營於上年十一月二十四日馳赴黃麻渡會合王可陞防

軍誘賊過河一擊敗之旋報花旗廣匪六萬餘眾由甯國縣進

竄歇建廟直至高橋楊柳鋪吳村馬頭鎮一帶布滿賊館自甯

郡南至涇縣北至鮑超營盤被賊阻隔卽自高祖山老營以至清弋江南陵亦幾爲賊氛所梗鮑超以老營空虛懼有挫失遂自黃麻渡捲旗息鼓振旅還援遙見四面傳烽煙燄紛起訶知僞跟王藍逆一股已對高祖山下寨僞佑王李逆一股已對清弋江下寨另有賊騎數百由寒亭高祖山摩壘而過繞出抱龍岡襲我營之後鮑超旣次清弋江先派朱國永守定高祖山二十七日昧爽部勒各營徑從抱龍岡進令周有勝正中營王有慶正左營萬守根正右營孫得友華左營攻中路唐仁廉仁字營劉天勝副後營吳雲集春中營羅國才霆後營攻左路譚勝達新右營李文益新後營洪容海啟化營鄧雲貴霆前營攻

右路賊恃眾悍列陣來拒旌旗一展鼓音若雷我軍以排槍輪
擊多有應聲而殪者賊乃愈聚愈眾密布長圍傷我營哨數人
羅國才衝賊過猛並陷於陣鮑超旋令梁美材王清泉萬鳳書
劉順隆何紹彩唐友勝黃海清等營自山岡後分兩枝鈔入截
賊數段賊隊大亂奪路竄奔諸將士合力薄之遂將歇建廟至
楊柳鋪十數村落中賊卡賊壘一律平毀追襲近六十里殲賊
近八千人擒獲無算此十一月二十七日進攻馬頭鎮楊柳鋪
等處大勝之情形也自有此捷凡附近我營之高嶺梅嶺麒麟
山各賊股伏匿不出者經月十二月二十五日鮑超抽隊出剿
行次中途以積潦未乾泥淖盈尺不利軍行而止正月初一日

偽匡王奉王襄王諸酋糾合花旗股匪竄入大坑黃村進逼涇
縣城南包過城東擁眾六七萬人連營二十餘座各村煙火相
接彌望皆賊初四日該逆架梯蒙絮悉銳撲城城中守將易開
俊吳廷華等率勇登陴以木石下擊賊始斂退維時鮑超在高
祖山聞警恐涇城不支將貽甯郡後路之患計莫如速往擊之
乃簡行隊疾馳九十里初五日抵涇入城少憩初六日五更時
裹飯傳餐拔關齊出先遣王衍慶鄧雲貴張遇春唐仁廉李文
益唐得勝六營蹴過山麓分匿叢箐深樹閒而以易開俊吳廷
華所部遙爲之應復令塙雲慶羅文宓周德馨何文喜四營依
山而上譚勝達蕭淩雲洪容海陳開用四營循河而上鮑超督

飭梁美材王清泉萬鳳書三營暨黃海清孫得友騎隊直前挑戰羣賊爭相出巢從山梁撲下婁雲慶羅文宓等正當其衝梁美材王清泉黃海清等步馬競進戰逾兩時將弁多有損折羅天順躍入重圍被賊矛抉出右目顛暈馬下王清泉急率步卒挾之而走亦爲飛子所傷約軍佯退引賊將近山麓號鼓一聲伏兵頓發婁雲慶等回鞭轉鬪面面夾擊賊乃大敗正欲歸壘瞥見壘中火起已爲譚勝達等所破我軍乘勝併進盡掃羣壘立解涇縣之圍長驅三十餘里遂入黃村賊不虞官軍之驟至有棄壘欲遁者有閉壘死守者衆軍士擁至濠下搶拔地鍼肉薄而登又平十數壘追二十里至大坑斃賊盈萬初七日鮑超

自涇縣回軍適西河之賊撲近寒亭高祖山老營將圖乘虛一
逞南望旗幟蔽空軍容甚盛乃相顧錯愕曰鮑超來矣亦卽一
閔散走此正月初六日馳援涇縣力解重圍之情形也臣查甯
國境內徧地逆氛鮑超以病餘之將新補之卒四出雕剿得此
兩戰軍威可以復振危局可以漸安所有出力人員可否酌給
獎敘以作士氣出自

聖恩至參將羅國才等六十七員并均係前後力戰陣亡相應
另繕清單請

旨勅部各照原銜從優議卹所有官軍在馬頭楊柳鋪大獲勝
仗並解涇縣城圍緣由謹繕摺由驛六百里馳奏伏乞

皇太后

皇上聖鑒訓示謹

奏

近日軍情並陳親赴金陵察看片

同治二年正月二十七日

再近日軍情金陵甯國各營穩守如常太平石埭等股跼伏未動宣城縣屬之金寶圩於上年臘月二十日被僞侍王率眾攻破該圩練丁逃至蕪湖者數千臣爲編營安插聞侍逆在圩中大掠米糧仍圖窺伺蕪湖金柱關一帶該兩處防務暫難鬆勁北岸無爲州原駐樹字五營本係李鴻章新募之卒現因救援常熟進攻崑太兵力不敷飛調樹字等營回滬另撥韋志俊一軍駐防無爲州城蕭慶衍專顧銅城閘一路尙足堵禦毛有銘專顧巢縣一路實形單薄又在六安州酌抽元中瑞左兩營助之惟九洑洲江面續有賊船百餘號晝夜趕渡據搜獲僞文賊

欲先攻浦口江浦以通進兵之路臣恐前敵各防未能穩固亟須親往察看通籌攻守事宜此次拜摺後卽曰由水路駛赴金陵及無爲州蕪湖金柱關等處巡視一次往返約需月餘安慶存城兵勇尙有四千餘人責成司道各員權爲統率暫可無虞萬一巢縣踞匪蓄意西竄臣亦卽兼程旋省以資調度而顧根本所有軍務大概情形併微臣親赴前敵察看緣由理合附片陳明伏乞

皇太后

皇上聖鑒謹

奏

查閱沿江各軍並近日軍情摺

同治二年二月十二日

奏爲

微臣

查閱沿江各軍現抵金陵大營恭報近日軍情仰祈

聖鑒事竊

臣

親赴前敵各軍查閱營伍曾於正月二十七日附

片陳明在案次日自省起程乘舟下駛二十九初一兩日行過

池州大通聞蕪湖金柱關軍情喫緊初三日趕至蕪湖初四日

周歷城壘旋赴裕溪口晤侍郎

臣

彭玉麟由東西梁山駛赴金

柱關詢悉僞侍王連日撲犯該處二十四日在薛鎮獲勝一次

初一日在梅塘觜始戰小挫旋獲大勝初三日復獲勝一次初

五日

臣

行抵烏江水營與提

臣

楊岳斌同至金陵之大勝關初

六入雨花台營盤

初七八等日逐段查閱均尙穩固疊據探報

忠逆之黨僞愛王黃崇發僞顧王吳如孝等股續渡九洑洲二
十七以後屢撲李世忠部將陳自明營盤至初二夜失陷初三
早浦口繼陷該逆遂分撲江浦橋林城壘勢甚猖獗聞將先竄
西梁裕溪再犯無爲廬州等語又據甯郡各軍稟報初一日廟
埠等處之賊分小股逼近郡城劉松山出城迎剿擒斬多名而
大股由敬亭山趨併楊柳鋪圍撲鮑超高祖山老營鮑超督率
諸將分路出擊大獲全勝旋即收復西河其小淮甯馬家園等
處賊壘亦經王可陞於初二日率師掃蕩由是鮑超乘勝進攻
又將紅楊樹高嶺梅嶺竹塘仰賢圩麒麟山各壘全行平毀其
灣汴一股經水師於初五日擊退綜計甯郡西南北三面百餘

里之賊一律掃除惟水陽鎮金寶圩尙未克復自去秋以來奇險疊生仰託

聖主鴻福竟得轉危爲安竇屬至幸臣以南岸局勢較鬆調駐防三山之劉連捷三營北渡無爲州與毛有銘協守石澗埠調駐防寒亭之梁美材三營北渡廬州與石清吉協守郡城曾國荃亦撥熊登武等營添紮東西梁山以保要隘惟巢含以上地勢寬曠賊數眾多目前兵力單薄未敢浪戰必俟李續宜銷假回任江忠義由湘東來乃能會剿皖北由巢含迤邐而下直至浦口九洑洲除北岸之逆氛復去夏之初議至石埭太平之賊於初一日竄至黟縣旋即退出嶺外於潛昌化之賊初三日竄

近徽郡唐義訓迎擊獲勝此兩股意圖內犯江西不知能堵截
回竄否臣將金陵戰守事宜商定卽赴九洑洲相度地勢迴舟
西上仍往蕪湖裕溪無爲州一帶詳加察看如果巢賊上竄自
當兼程回省以固根本要地聞李世忠親赴五河所有浦口九
洑洲失陷情形尙未接其咨報卽甯國徽州金柱關三處大捷
亦未接其詳報除各路戰狀及應獎應卹人員續行具奏外謹
將微臣行程及南北兩岸近日軍情先陳梗概伏乞

皇太后

皇上聖鑒訓示謹

奏

由金陵回皖沿途查閱並近日軍情摺

同治二年二月二十七日

奏爲

微臣

由金陵回皖沿途查閱恭報近日軍情仰祈

聖鑒事竊

臣

行抵金陵曾將兩岸軍情於本月十二日具陳梗

概在案十五日由大勝關赴九洑洲該處江路狹隘與南岸草
鞋夾列壘對峙是日風霾蔽塞瞭望不甚明晰卽於次日回舟
西上十八日入金柱關小河查閱龍山橋三汊河查家灣等處
十九至二十二等日由東西梁山入裕溪口小河查閱雍家鎮
運漕石澗埠無爲州等處二十三日由神塘河出江現在舟抵
大通不日卽可旋省北岸之賊十六日續陷江浦縣城新河口
營壘迤邐西竄徘徊於巢含全椒之間未遽深入其僞忠王蹤

迹據李鴻章函稱該酋因浙東肅清調集羣賊併守杭省而自
畱蘇州未出據蕭慶衍稟稱該逆實已北渡於十三日入巢縣
城據各路生擒賊供僞天王令忠酋力攻西梁無爲州圖取廬
州和州之米令侍酋力攻蕪湖金柱關圖取甯國太平之米欲
還昔歲之舊觀以保金陵之巢穴各等語逆謀詭祕其確情不
得知也臣所調劉連捷三營已到石澗埠與毛有銘共紮十一
營地勢寬曠尙嫌兵單此外如西梁運漕無爲廬州等處亦僅
力能自固非俟李續宜江忠義到皖難以輕進南岸自甯國屢
捷後惟金柱關侍逆一股爭戰不休初一十六等日兩次猛撲
查家灣該逆雖大受懲創我軍亦疊有傷亡正擬令鮑超攻取

金寶圩進勦東壩以固皖南之藩籬而鈔侍逆之後路乃徽州
青陽兩處連日警報頻至石埭之賊黃文金古隆賢等併犯青
陽太平之賊分竄徽州各嶺又有花旗譚星兩股由浙江敗回
麇集徽境唐義訓初三日擊退歙南一路其東北兩路愈來愈
眾繞過郡城之西十五日唐義訓帶隊出勦從富竭橫至岩寺
街頗有擒斬而別股從黃山南來十五日猛撲休甯縣城唐義
訓以休城僅畱三營不敷守禦添派王華雲一營十六日入城
協守至祁黟一帶王文瑞於初十日擊退竄擾石坑南湖之賊
其大洪禾戌等嶺時有逆蹤窺伺防不勝防臣本擬令朱品隆
回援徽州因青陽喫緊該軍不能抽動不得已令鮑超暫緩東

壩之行而先從南陵馳救青陽以解目前之急左宗棠肅清浙
東卽慮敗逆回竄皖南亦派劉興一軍援應徽州羣逆皆窮餓
之餘無巢可歸蓄意闖入善地就食江西若徽休青陽等城倖
得保全該逆或由祁西以竄饒景或由歙南以竄婺源均爲江
西北邊之患臣時時兢惕並函告沈葆楨預爲防範合力維持
所有微臣回皖行程及近日各路軍情謹繕摺具陳大概其詳
細戰狀仍俟分案續奏伏乞

皇太后

皇上聖鑒訓示謹

奏

沿途察看軍情賊勢片

同治二年二月二十七日

再密陳者臣巡閱諸軍詳觀賊勢攬南北之形勝察天人之徵應竊以爲有可懼者數端而可喜者亦有數端自池州以下兩岸難民皆避居江心洲渚之上編葦葺茅棚高三尺壯者被擄老幼相攜草根掘盡則食其所親之肉風雨悲啼死亡枕藉臣舟過西梁山等處難民數萬環跪求食臣亦無以應之二月十五日大勝關江濱失火茅棚數千頃刻灰燼哭聲震野苦求販卹他處蘆棚叢雜亦往往一炬萬命徽池甯國等屬黃茅白骨或竟曰不逢一人又聞蘇浙之田多未耕種羣賊無所得食故壹意圖竄江西并窺伺皖浙已復之區平民無所得食弱者轉

從溝壑黠者則從賊以偷生旦夕黨羽無定數酋長無定謀便
恐變爲流賊更難收拾而諸僞王中如李世賢失金華楊輔清
失甯國黃文金失蕪湖古隆賢失青陽劉官方失池州巢穴雖
破醜類尙多其意怏怏不甚服僞天王忠王之調度其行徑亦
與流賊相近李世忠之心迹中外皆不敢深信頃因捆鹽構衅
親赴五河雖浦口江浦失守尙未聞其回營主持與都興阿楊
岳斌蕭慶衍均有違言親匪類而遠正人逞小忿而忘大局茲
值敗軍失地之際又奉革職畱任之

旨竊恐其轉羞成怒倒行逆施則裹下河先受其災而此次北
渡之賊亦有直犯裹下河之謀鹽場尙有疏失全局愈難支持

凡此皆可懼之端也粵匪初興粗有條理頗能禁止奸淫以安
裹脅之眾聽民耕種以安佔據之縣民間耕獲與賊各分其半
故取江南數郡之糧運出金柱關取江北數郡之糧運出裕溪
口并輸金陵和春等雖合圍城外而賊匪仍擅長江之利挹不
竭之源傍江人民亦且安之若素今則民間賊至痛憾椎心男
婦逃避煙火斷絕耕耨者無顆粒之收相率廢業賊行無民之境
猶魚行無水之地賊居不耕之鄉猶鳥居無木之山實處必窮
之道豈有能久之理而東南要隘如安慶蕪湖廬州甯國東西
梁山金柱關裕溪口暨浙之金華紹興此皆山川筋脈必爭之
地但求此數處不再失守終足以制該逆之死命昔年粵賊所

奏稿卷二十一
至築壘如城掘濠如川堅深無匹近亦曰就草率而官軍修壘
濬濠今實遠勝於昔城中羣酋受封至九十餘王之多各爭雄
長苦樂不均敗不相救而官軍仰承

聖謨三江兩湖水陸各營頗能和衷共濟呼應靈通至百姓仰
戴

皇仁淪肌浹髓雖臣等撫綏無術治軍無效斯民久陷水火之
中曾不一聞怨咨之語翹首而望平寇擊壤而謳吾

君意者民心所在天祐孔長凡此皆可喜之端也臣從軍數年
從未敢以賊勢稍衰入奏惟念西北軍興

皇太后

皇上焦勞彌甚故將南中可喜之機陳述一二仰慰

宸廑至可懼之端

臣殫竭愚慮勉思補救裏下河若有疏失當

在此兩月之中難亟謀挽回之術若竊號巨股變爲流賊昔

文宗皇帝嘗慮及之但求金陵蘇杭三處有一二克復卽當大

赦羣酋廣爲招撫以庶幾赤眉百萬同日納降之盛軌此中自

有天意不盡關乎人謀至李世忠雖梟桀猜忌而其部卒頗懷

攜貳又不善戰縱或激之生變亦尙不足深慮臣始奉將李世

忠革職畱任之

諭本擬暫不宣示繼思該提督驕恣已久尾大不掉急亦有變

緩亦有變終不能相安無事卽日當宣示

諭旨待李續宜江忠義軍到由巢含一路東下進攻江浦等處
屆時或將李世忠失守各城嚴參懲究再行相機辦理理合一
併密陳伏乞

皇太后

皇上聖鑒訓示謹

奏

鮑超軍克甯國近城要隘摺

同治二年三月十二日

奏爲提督鮑超攻破賊巢悉復西河小淮審紅楊樹麒麟山諸要隘恭摺馳報仰祈

聖鑒事竊照鮑超一軍會合何紹彩王可陞所部分剿高嶺西河直至麒麟山將賊壘全行平毀臣於二月十二日具陳梗概在案先是僞輔王楊輔清糾約僞隨王跟王堵王孝王佑王等酋嘯聚西河灣江紅楊樹黃麻渡麒麟山一帶不下十餘萬人以一大枝鈔出高祖山之前潛匿卹落中距我營七八里十數里不等以一小枝繞過高祖山之背橫出楊柳鋪揚言上犯涇縣火光燭天晝夜不滅鮑超見山前賊旗隱約山後煙燄突起

計在誘我赴涇圖襲老營乃令宋國永布置高祖山營寨堅壁
穩守而在板橋寒亭清弋江等營抽隊數成親自督率設伏於
太子廟山坳以伺其變二月初一日昧爽楊柳鋪火光漸息訶
知甯郡守將劉松山督同劉光明賀國楨李芳菲等出城雕剿
殲擒數百人李芳菲率前哨躡賊中礮死之楊柳鋪一股旋向
烏沙鋪遁去鮑超料該逆不得逞於郡城必將挾全刀以撲我
營自登太子廟山岡瞭望果見烏沙鋪之賊進逼獅子山去營
不遠各邨落之賊分三四萬眾旌旗蔽空迤邐而來將高祖山
八營層層圍裹有擁至濠下爭拔花籬者鮑超急帶太子廟伏
軍向山僻小徑捲旗疾趨行至離營二里許聞營中礮聲轟發

知老營業已出隊接戰卽派譚勝達顏紹榮甘星平徐連陞等直取中路萬守根洪容海羅文宓張遇春等由營後左路進以婁雲慶黃海清唐得勝數隊爲之應王衍慶何紹彩曹志忠等由營後右路進以唐仁廉鄧榮貴孫得友數隊爲之應仍令梁美材王清泉萬鳳書等潛伏茯苓山之旁以斷賊後部勒旣定但聞鼓角一聲譚勝達萬守根王衍慶各軍突分三路包賊雲時合圍宋國永乘勢從各營夾縫中擊出截賊數段鄧訓誥周有勝等張兩翼鈔殺賊隊譁亂不復成伍正思奪路竄走適婁雲慶黃海清唐仁廉等馬步齊至我軍縱橫盪決賊之前鋒鮮有脫者而賊之後隊尙欲抵死來援鮑超揮令諸將士奮力衝

擊追近扶苓山梁美材大呼突出早斷歸路羣賊駭懼罔知所措紛紛竄入田壠眾軍合力蹙之追襲四十餘里遂平高嶺周家橋諸壘直抵西河賊乃倚水爲險對河列陣意圖抗拒俄而盧榮忠帶霆營礮划由清弋江駛下我軍結筏爭渡水陸夾剿俘戮無算立毀堅巢敗賊始往桃花園灣汴一路而遁此二月初一日擊賊大勝攻克西河之情形也西河以北曰馬家園爲眾賊屯糧之所迺西則曰黃麻渡曰小淮窰爲王可陞進兵之地西河旣復王可陞知羣賊膽寒卽於初一夜派蔣占鼇楊忠楊明貴等會約駐守義橋之楊正彪各率行隊進取小淮窰親督陽華坤謝占春馬承恩數營取道黃麻渡潛襲馬家園逆壘

時已夜分更鼓將絕王可陞令軍士傍壘縱火悉焚賊糧賊不知官軍之猝至在睡夢中披衣急起棄壘狂奔小淮窩之賊正欲聞警赴援蔣占鼃等已斫斷浮橋破卡而入乘勝逐之蹙偪入水者無數沿途卡壘盡毀靡遺維時賊之由西河遁入灣沚者經盧榮忠礮划隨同外江水師日夜轟擊賊不能堪乃於初二初三等日縮入灣沚之後山退聚竹塘旋分大股歸併梅嶺麒麟山意在伺閒再逞鮑超謂賊欲雖衰不速除之終貽後患初四日引軍渡河進次紅楊樹偪壘而陣壘賊匿不出戰我軍相持數時羣以火器環擲延燃哨棚軍士冒煙突火踰濠直進一壘旣陷眾壘盡亂各將弁揮隊盪擊殲獲頗眾直追過桃花

園竹塘灣止後山賊皆聞風先遁遂焚其巢是夜鮑超遺書劉松山令於初五白自郡城率師來會將有事於梅嶺及麒麟山天甫向曙秣馬蓐食傳令宋國永熊鐵生梁美材等十五營專攻麒麟山叟雲慶唐仁廉黃海清等馬步八營專攻梅嶺而以劉松山所帶各旗營爲斷後行未十數里賊竟糾衆來迎宋國永同各營哨就山麓布列陣勢直前搏戰潛遣銳卒自山後攀旗先登襲破賊壘周麾而呼賊咸驚疑卻顧宋國永等縱兵掩擊積尸若阜麒麟山堅壘悉平是日劉松山亦破廟埠之壘殲賊千餘叟雲慶鄧榮貴等擊破梅嶺之壘並收復仰賢圩各處餘匪分道竄逸一由新河莊敗往東壩一由油榨溝敗往廣德

建平此初二至初五等日疊克馬家園小淮窩及紅楊樹梅嶺麒麟山等隘之情形也臣查西河小淮窩爲水路衝要自被賊踞數月糧運梗阻大爲甯國各營之患仰賴

聖主威福將士同心五日之間悉復諸隘距郡城數十里內一律肅清在事人員厥功甚偉可否彙入楊柳鋪涇縣各案酌給獎敘之處出自

鴻施逾格至力戰陣亡之參將李芳菲等二十六員并另繕清單請

旨勅部從優議卹以慰忠魂所有鮑超各軍連克甯國近城要隘緣由謹繕摺由驛五百里具奏伏乞

奏
皇上聖鑒訓示謹

近日軍情片

同治二年三月十二日

再近日軍情金陵駐守如常甯國自二月初屢捷後鮑超派何紹彩一軍守西河王可陞一軍守灣沚洪容海一軍守清弋江其劉松山仍守甯國府城易開俊仍守涇縣朱品隆仍守青陽縣又換調吳廷華守南陵縣逐節布置糧運通暢甯郡應無他虞蕪湖金柱關兩防自前月十六日大戰獲勝該逆至今不敢再逞臣於二十七日過大通聞黃文金等大股由青陽上竄臣卽兼程西旋次日抵省調喻吉三護軍二營赴池州李榕鈞字五營赴東流以截賊竄江西之路乃兵甫渡江賊已由建德闌入彭澤鄱陽境內而譚星及古賴等股又蔓延於徽州各屬兩

路皆有深入江西之計幸浙江臬司劉典與唐義訓王沐等在
休歙兩縣屢獲勝仗徽州一路必可擊退其由建德一路竄入
者實恐貽江西腹地之憂臣正檄令鮑超由青陽赴援景德鎮
冀保江西完善之區旋據北岸各營告警僞忠王大股上竄分
枝牽制廬江無爲州之兵而以全力猛撲石澗埠毛有銘劉連
捷營盤自初三至初七日晝夜圍攻糧路斷絕文報不通臣不
得已又飛檄鮑超改旆渡江以解石澗埠之圍曾國荃亦自金
陵分撥五營救援該處不知均趕得及否又有捻匪一股從河
南竄入湖北之麻城經鄂軍堵剿卽自三里埂竄至蘄水境內
其勢亦將歸併皖境髮捻聯成一片安慶廬州各屬處處喫緊

竄入江西之賊別無大支勁旅可以派往援剿幸撫臣沈葆楨
久調水陸萬餘人分守景鎮樂平兩處或者足資扼堵江之南
岸徽州與江西同警江之北岸下游與上游同警臣調度無方
憂灼實深除石澗埠等處戰守情形續行具奏外理合附片先
陳梗概伏乞

皇太后

皇上聖鑒謹

奏